



Vogošća, ul. Jošanička br. 80, tel: 00387 33 586 412, 586-407

Broj: 12-04-sl./26

Vogošća, 01.07.2026. godine

VIJEĆNIČKA PITANJA
POSTAVLJENA NA 19. REDOVNOJ SJEDNICI OPĆINSKOG VIJEĆA VOGOŠĆA
održanoj 30.06.2026. godine

Na 19. redovnoj sjednici Općinskog vijeća vijećnik **Gluhović Alija (u ime Kluba vijećnika Naprijed BiH)** postavio je slijedeće vijećničko pitanje:

19/1. Kada će se izvršiti sanacija pasarele u Hotonju i ista pustiti u funkciju, obzirom da je ista već duže vrijeme zatvorena, posebno zbog činjenice da je u toku ljetni raspust. Da li će se pasarela do početka nove školske godine staviti u funkciju, kako bi djeca mogla sigurno ići u školu.

Vijećnik **Efendić Emir (u ime Kluba vijećnika S BiH)** postavio je slijedeća vijećnička pitanja:

19/2. Kada će od strane nadležne službe biti uklonjeni psi lutalice sa stadiona „Hakija Mršo“. U posljednje vrijeme primjećeno je nekoliko pasa lutalica koji se nalaze na stadionu i sportskom terenu, dok djeca treniraju atletiku ili fudbal. Djeca se zbog prisustva pasa lutalica na stadionu ne osjećaju sigurno prilikom obavljanja sportskih aktivnosti takmičenja i treninga. Da ne bi došlo do neželjenih posljedica po djecu kojih ne mali broj trenira na navedenom stadionu, potrebno je što hitnije ukloniti pse lutalice sa stadiona „Hakija Mršo“.

19/3. Građani postavljaju pitanje kada će biti riješen projekat kanalizacione mreže za naselje Donja Jošanica, obzirom da su u gornjem dijelu naselja kanalizacije izvedene u lokalni potok koji se ulijeva u rijeku Vogošću. Međutim, prilikom obilnijih padavina dolazi do zagušenja korita potoka u donjem dijelu naselja, usljed čega dolazi do njegovog izlivanja i izbacivanja fekalija koje se izljevaju u dvorišta kuća i na taj način ugrožavaju zdravlje ljudi. Obzirom na dugotrajan problem navedene kanalizacije, potrebno je da nadležne službe izađu na lice mjesta, te poduzmu mjere kako bi spriječile izlivanje navedenog potoka i time doprinjeli otklanjanju rizika od mogućeg širenja zaraznih bolesti i ugrožavanja stanovnika navedenog naselja.

Vijećnica **Curić Samira (u ime Kluba vijećnika SDP)** postavila je slijedeće vijećničko pitanje:

19/4. Na osnovu obraćanja građana, postavljam pitanje nadležnoj općinskoj službi u vezi sa problemom zapuštenog zemljišta u ulici Vogošćanskih odreda, između stambenih zgrada broj 2a., 3a. i 4a., te zgrada broj 2b., 3b. i 4b. Naime, predmetni prostor je usljed dugotrajnog neodržavanja zarastao u visoku travu i nisko rastinje, te se pretvorio u ozbiljno zapušteno i potencijalno opasno područje. Prema navodima stanara, na tom lokalitetu su se pojavile i zmije, zbog čega građani strahuju za vlastitu sigurnost i sigurnost svoje djece, a pojedini stanari se ne usuđuju ni otvarati prozore i vrata svojih stanova. S tim u vezi, postavljam sljedeće pitanje: ko je vlasnik predmetnog zemljišta i da li je ono u vlasništvu Općine. Ukoliko se radi o općinskom zemljištu, molim da nadležna služba po hitnom postupku poduzme mjere na uređenju i čišćenju navedene površine. Ukoliko zemljište nije u vlasništvu Općine, da li postoji mogućnost da Općina, u okviru svojih nadležnosti, naloži ili obaveže vlasnika da angažuje ovlaštenu firmu radi hitnog uređenja i otklanjanja opasnosti. Cilj ovog pitanja je hitno pronalaženje rješenja kako bi se stanovnicima omogućili sigurni i dostojanstveni uslovi za život.

Vijećnik **Piknjač Admir (Narod i pravda)** postavio je slijedeća vijećnička pitanja:

- 19/5.** Obzirom da je većina izabranih vijećnika u Općinskom vijeću postavila nekoliko inicijativa i pitanja u vezi pasarele u MZ Hotonj, pitam nadležnu općinsku službu šta je do sada urađeno po pitanju izrade projektne dokumentacije, rekonstrukcije ili eventualne izgradnje nove pasarele za prelaz pješaka preko magistralnog puta M18. Molim da se dostavi informacija o statusu aktivnosti, eventualnim planovima i rokovima realizacije sanacije, odnosno izgradnje pasarele i stavljanje u funkciju.
- 19/6.** Na prethodnim sjednicama Općinskog vijeća dogovorili smo da se pravovremeno izvrše sve pripreme za grejnu sezonu 2026/2027 kako bi se izbjegli problemi sa kršenjem početka grijanja i osigurala stalna isporuka toplotne energije građanima. Postavio bih nekoliko pitanja nadležnima iz ove oblasti:
- Da li je nadležna općinska služba izvršila sve potrebne aktivnosti i koordinaciju u vezi priprema za grejnu sezonu 2026/2027.
 - Da li je preduzeće BAGS- Energotehnika izvršilo remont sistema za grijanje i obezbjedilo dovoljne količine energenata, uključujući i izmirenje prethodnih zaduženja (dugova), kako bi spremni dočekali grejnu sezonu 2026/2027.
 - Da li je Ministarstvo privrede Kantona Sarajevo u saradnji sa Vladom Kantona Sarajevo osiguralo finansijska sredstva i donijelo potrebne Odluke za nesmetan i stalan početak i završetak grejne sezone 2026/2027.
 - Kada se očekuje pismeno dostavljanje vijećnicima izvještaja po tom pitanju.

Vijećnik **Mehić Almedin (u ime Kluba vijećnika SDA)** postavio je slijedeće vijećničko pitanje:

- 19/7.** Na zahtjev građana naselja Ugorsko, konkretno dio ulice Muje Šejte u kojoj se prije par mjeseci desilo klizište, odnosno odron ulice, postavljam pitanje u kojoj je fazi rekonstrukcija navedene dionice i kada građani mogu očekivati nesmetano kretanje i korištenje ulice. Ulica je od veoma bitnog značaja za stanovnike naselja Ugorsko, a i građane koji je koriste kao alternativnu saobraćajnicu da bi izbjegli gužve.

Vijećnik **Hebib Armin (u ime Kluba vijećnika SDP)** postavio je slijedeća vijećnička pitanja:

- 19/8.** Da li su nadležne općinske službe upoznate s pucanjem vodovodne cijevi u ulici Akifa ef. Biserovića, kod broja 7, te da li su o navedenom kvaru obavijestile nadležno javno komunalno preduzeće radi hitne sanacije.
- Obrazloženje:
Na navedenoj lokaciji došlo je do pucanja vodovodne cijevi, usljed čega dolazi do kontinuiranog izlivanja velike količine vode na kolovoz i okolni prostor. Ovakvo stanje predstavlja nepotreban gubitak pitke vode, može ugroziti sigurnost učesnika u saobraćaju i pješaka te prouzrokovati oštećenje saobraćajnice i druge komunalne infrastrukture. S obzirom na značaj blagovremenog reagovanja, potrebno je utvrditi da li su nadležne općinske službe evidentirale navedeni problem i da li su o istom pravovremeno obavijestile nadležno javno komunalno preduzeće, kako bi se kvar sanirao u što kraćem roku.
- 19/9.** Da li su nadležne službe upoznate s problemom javne rasvjete koji imaju građani u ulici 24. juni, do broja 46.
- Obrazloženje:
Stanovnici ulice 24. Juni, do broja 46, suočavaju se s problemom nefunkcionalne javne rasvjete. Ovaj problem značajno utiče na kvalitet života građana, njihovu sigurnost, kao i sigurnost u saobraćaju, naročito u večernjim satima. Nedostatak rasvjete povećava rizik od saobraćajnih nesreća, otežava kretanje pješaka, posebno djece i starijih osoba, te predstavlja sigurnosni rizik, jer smanjena vidljivost može olakšati izvršenje krivičnih djela poput krađa ili vandalizma. Stavljanje u funkciju javne rasvjete u ovom dijelu ulice riješilo bi navedene probleme i doprinijelo većoj sigurnosti svih građana. S tim u vezi, postavljam ovo vijećničko pitanje kako bi se utvrdio status rješavanja ovog problema i eventualne mjere koje nadležne službe planiraju poduzeti.

Vijećnica **Karović Amra (u ime Kluba vijećnika SDP)** postavila je slijedeća vijećnička pitanja:

19/10. Kada nadležne službe planiraju početi sa aktivnostima uređenja i rekonstrukcije dječijih igrališta i parkova, jer se isti nalaze u jako lošem stanju.

Obrazloženje:

Obzirom da Općina Vogošća važi kao primamljiva za mlade bračne parove, povećan je i broj djece. Međutim igrališta i parkovi nisu prilagođeni ni broju djece, ni uzrastu. U jednom parku koji se nalazi u centralnom dijelu Vogošće i koji važi za glavni dječiji park postoje tri ljuljačke. U predvečernjim satima se skupi više desetina djece različitog uzrasta. Djeca nemaju niti jedno igralište, niti park koji izgleda reprezentativno.

19/11. Kada nadležne službe planiraju pokositi travu u lici 24. juna dužinom ulice koja vodi prema Novoj Vogošći i preko puta brojeva ulaza 34. i 36. Fotografija u prilogu.

Vijećnik **Handžić Jasmin (u ime Kluba vijećnika SDA)** postavio je slijedeća vijećnička pitanja:

19/12. Molim nadležnu službu da dostavi informaciju o statusu projekta izgradnje kružnog toka na lokalitetu Kobilja Glava:

- Kada se očekuje početak izvođenja radova i koji je planirani rok za završetak projekta.
- Da li je izrađena projektna dokumentacija i da li su osigurana potrebna finansijska sredstva.
- Da li su riješeni imovinsko-pravni odnosi i da li su pribavljene neophodne saglasnosti za realizaciju samog projekta.

19/13. Pitanje upućujem prema Ministarstvu unutrašnjih poslova Kantona Sarajevo:

- Zamolio bih da se objasni procedura po kojoj Ministarstvo unutrašnjih poslova Kantona Sarajevo vrši kontrolu i na koji način provodi mjere zaštite koje se odnose na mjere zabrane prilaska, izrečenih licima koji su počinili nasilja u slučajevima porodičnog nasilja.
- Također, da mi se dostavi informacija koliko je u proteklom periodu evidentirano kršenja mjera zabrane prilaska i na koji način policija prati i sankcioniše izrečene mjere.
- Da li Ministarstvo raspolaže kadrovskim kapacitetima za efikasan nadzor, te da li se razmatra uvođenje sistema elektronskog nadzora putem narukvica za nasilnike kojima je izrečena zabrana prilaska, te da li postoji registar evidentiranih osoba-lica nasilnika u porodici.

Vijećnik **Omerović Denis (u ime Kluba vijećnika SDP)** postavio je slijedeća vijećnička pitanja:

19/14. Kada će biti realizovana usvojena inicijativa iz februara mjeseca koja se odnosi na uklanjanje starog i truhlog drveta koje u slučaju pada ugrožava sigurnost stanovništva i učesnika u saobraćaju. Da li je prihvatljivo da se na realizaciju mjere koja može dovesti do sprječavanja tragičnog ishoda čeka nekoliko mjeseci i ko će snositi odgovornost, ukoliko zbog nepostupanja nadležnih dođe do povreda građana ili materijalne štete, s obzirom da realizacija inicijative do danas nije izvršena.

19/15. Postavljam pitanje Načelniku Općine Vogošća i nadležnoj općinskoj službi. Na dijelu puta u ulici Muje Šejte, tačnije ispred kuće Ismeta Kadrića, ponovo je pokrenuto klizište koje ugrožava putnu komunikaciju i sigurnost stanovnika ovog dijela naselja. Podsjećam da je na istoj lokaciji došlo do propadanja puta još 2014. godine, kada su zbog klizišta prekinuti vodovodna i plinska mreža koje napajaju ostatak naselja. Tada je izvršena samo privremena sanacija, pri čemu je put poduprt drvenim kolcima i daskama kako bi se omogućio prolaz stanovništva. Vodosnabdijevanje je ubrzo obnovljeno, dok je dio stanovništva bez plina ostao sve do kraja 2018. godine, kada je nakon brojnih zahtjeva građana prema Sarajevo-gasu ponovo uspostavljen protok plina. Građanima je još 2014. godine rečeno da je u pripremi projekat trajne sanacije oko 30 metara ovog puta. Međutim, ni nakon 12 godina projekat nije realizovan, a građanima se i dalje daje isti odgovor – da se „čeka projekat“. S tim u vezi postavljam sljedeća pitanja:

1. Da li postoji izrađen projekat trajne sanacije klizišta i puta u ulici Muje Šejte, ispred kuće Ismeta Kadrića.
2. Ako projekat postoji, u kojoj se fazi nalazi i zbog čega do danas nije realizovan.

3. Ako projekat ne postoji, zbog čega nije izrađen i ko snosi odgovornost za višegodišnje nepostupanje.
 4. Da li je izvršena stručna procjena trenutnog stanja klizišta i stepena ugroženosti stanovništva, putne infrastrukture, vodovodne i plinske mreže.
 5. Koje će hitne mjere Općina Vogošća poduzeti kako bi se spriječilo dalje klizanje tla i eventualna veća materijalna šteta ili ugrožavanje života građana.
 6. U kojem roku građani mogu očekivati početak trajne sanacije ovog dijela puta.
- Smatramo da su višegodišnja obećanja bez konkretnih aktivnosti ozbiljno narušila povjerenje građana u nadležne službe te očekujemo jasan i konkretan odgovor, kao i hitno poduzimanje mjera za trajno rješavanje ovog problema. Molim da se na pitanja odgovori kako su i postavljena, a ne da se odgovor formira u jednoj rečenici.

Vijećnik **Pašagić Almir** (u ime Kluba vijećnika **SDP**) postavio je slijedeća vijećnička pitanja:

19/16. Glavni građevinski radovi na proširenju škole "Zahid Baručija" i pripremi terena počeli su u julu 2023. godine. Kompletan dograđeni dio, koji uključuje savremene nove učionice i informatički kabinet, svečano je pušten u rad u septembru 2025. godine. Projekat je koštao oko 3,5 miliona KM, a finansirali su ga zajedničkim sredstvima Ministarstvo za odgoj i obrazovanje Kantona Sarajevo i Općina Vogošća. Nakon otvaranja novih učionica, u decembru 2025. godine zvanično je otvoren i novouspostavljeni prostor za produženi boravak učenika. Kada je planirana izgradnja fiskulturne sale za učenike, obzirom da sada idu u susjednu sportsku dvoranu, a vjerovatno kada je loše vrijeme tada nisu u mogućnosti da izlaze iz škole.

19/17. Da li je u posljednjih pet (5) godina izvršena zvanična inspekcija tehničke ispravnosti i bezbjednosti željezničke pruge (i prateće infrastrukture) koja prolazi kroz uži centar Vogošće, a kojom upravljaju Željeznice Federacije Bosne i Hercegovine (ŽFBiH). Ukoliko je inspekcija rađena, molim da se Vijeću dostavi prepiska, zapisnik o utvrđenom stanju ili izvještaj nadležnih inspeksijskih organa / stručnih službi ŽFBiH.

Obrazloženje:

Na dionici željezničke pruge koja prolazi kroz naseljeno mjesto i sam centar Vogošće vidljiva su značajna i progresivna oštećenja na željezničkim pragovima (dotrajalogost, truljenje i pucanje drvene/betonske mase). Obzirom da se ova pruga nalazi u neposrednoj blizini stambenih objekata, pješačkih zona i puteva koje svakodnevno koriste građani, trenutno stanje predstavlja potencijalni sigurnosni rizik. Kako bi se spriječile neželjene posljedice i osigurala bezbjednost lokalnog stanovništva, potrebno je da Općina Vogošća zvanično posreduje i zahtijeva od JP Željeznice FBiH hitno utvrđivanje stepena oštećenja i zamjenu dotrajalih pragova.

RUKOVODILAC
STRUČNE SLUŽBE ZA POSLOVE
OPĆINSKOG VIJEĆA

Crvenjak Elvir



Vogošća, ul. Jošanička br. 80, tel: 00387 33 586 412, 586-407, fax: 586-407

Broj: 12-04-sl./26

Vogošća, 02.07.2026.godine

**INICIJATIVE POKRENUTE
NA 19. REDOVNOJ SJEDNICI OPĆINSKOG VIJEĆA VOGOŠĆA
održanoj 30.06.2026. godine**

Na 19. redovnoj sjednici Općinskog vijeća vijećnik **Selimović Bego (u ime Kluba vijećnika SDA)** pokrenuo je slijedeću inicijativu:

- 19/1.** U ime građana MZ Svrake pokrećem inicijativu putem nadležne službe prema JP Autoceste Federacije Bosne i Hercegovine kojom tražim da se prontno djeluje i pokosi pojas zelene površine sa desne i lijeve strane autoputa od naplatnih kućica Jošanica u dijelu autoputa koji prolazi kroz dio općine Vogošća.

Obrazloženje:

Hvala Bogu u ovoj godini su završeni bukobrani za koje je borba dugo trajala. Građani Svraka imaju ozbiljan problem, ne vizuelni nego strani. Desna i lijeva strana zelenog pojasa autoputa su zarasli travom, šibljem i grmljem. Imamo šiblje bagrema čije su grane do 1 m i prostiru se na lokalnu cestu koja prolazi pored autoputa. Obzirom da ima nekoliko stajališta za učenike na navedenoj dionici lokalnog puta, prijeti opasnost da djeca budu ugrožena od zmija i drugih gmizavaca. Ako se odmah ne djeluje, teško će biti prometovanje vozila lokalnim putem, a da ostanu neoštećena. Mislim da ovdje nadležno JP Autoceste koje je u vlasništvu Federacije Bosne i Hercegovine ne radi svoj posao ili se selektivno odnosi prema nekim mjestima i regijama. Građani osjećaju da oni misle da nemaju ni oči ni pameti, da su samo dobar bankomat da kroz razne vidove finansiraju JP Autoceste i druga javnih preduzeća koja se bave tom djelatnošću. Nije bolja situacija ni na regionalnom putu Sarajevo-Tuzla, treba samo pogledati izlaz od kružnog toka na izlazu iz Vogošće do Vogošćanske petlje (desna strana).

Vijećnik **Gluhović Alija (u ime Kluba vijećnika Naprijed BiH)** pokrenuo je slijedeću inicijativu:

- 19/2.** Pokrećem inicijativu za postavljanje autobuskog stajališta kod tržnog centra Bingo u Ugorskom, ocrtavanje pješačkog prijelaza, postavljanje znakova ograničenja kao i eventualno postavljanje usporivača brzine, obzirom da se na ovoj lokaciji svakodnevno vrši prijem i izlazak učenika iz školskog autobusa.

Obrazloženje:

Već duži vremenski period ovaj problem je izražen, naročito zbog činjenice da su u pitanju djeca i da sve moramo učiniti da ih zaštitimo i osiguramo siguran odlazak i povratak kući iz škole. Trenutno stanje nije sigurno i stvara zabrinutost kod roditelja ovog naselja. Molim službu za hitno postupanje.

Vijećnik **Efendić Emir (u ime Kluba vijećnika S BiH)** pokrenuo je slijedeće inicijative:

- 19/3.** Pokrećem inicijativu prema nadležnoj općinskoj službi za čišćenje korita rijeke Vogošće od mosta kod Srednjoškolskog centra do mosta u ulici Porodice Hasagić.

Obrazloženje:

Već dvije godine postavljam vijećnička pitanja vezano za čišćenje korita rijeke Vogošće u dijelu od mosta kod Srednjoškolskog centra do mosta u ulici Porodice Hasagić i još uvijek nije ništa poduzeto po tom pitanju, a stanje je veoma zabrinjavajuće iz više razloga. Prvi dio se nalazi pored Srednjoškolskog centra Vogošća. Drugi dio se nalazi pored OŠ „Mirsad Prnjavorac“. Treći dio se nalazi duž pomoćnog i glavnog stadiona „Hakija Mršo“, sportske dvorane „Amel Bečković“, teniskih igrališta, pored OŠ „Zahid Baručija“ i obdaništa. Navedeno

korito rijeke je mjesto okupljanja raznih gmizavaca i štakora, a na tom području se u kontinuitetu nalazi prisustvo djece koja idu u školu ili se bave sportom. Pored navedenog, ispod stadiona „Hakija Mršo“ nalazi se nekoliko veoma dubokih šahtova koji su zarasli u travu i nisko rastinje, a koji nemaju poklopce zbog čega predstavljaju opasnost za upadanje djece, a i odraslih iz kojeg se ne bi mogli lako izvući teško bi ih bilo pronaći da se takav slučaj dogodi, a djeca često prolaze tim dijelom između korita rijeke i stadiona. Stoga je potrebno što hitnije očistiti navedeno korito rijeke, te postaviti adekvatne poklopce na betonske šahtove koji predstavljaju opasnost.

- 19/4.** Pokrećem inicijativu prema nadležnoj općinskoj službi da se popravi i naspe put od planinarskog doma „Motka“ prema Visojevici oko 1,5 kilometar područja općine Vogošća.

Obrazloženje:

Naime, navedeni put se nalazi na širem lokalitetu Motke na području općine Vogošća, trenutno je u veoma lošem stanju, a nalazi se na jednom od najboljih mjesta za planinare i izletnike na području općine Vogošća. S tim u vezi, potrebno je navedeni dio puta nasuti i popraviti, kako bi mogao služiti kako mještanima za pristup njihovim imanjima, tako i planinarima i ljubiteljima prirode koji obilaze navedeno izletište, kao i pristup vatrogasnim vozilima, jer se navedeni put koristi kako bi se gasili požari na navedenim područjima. Ovaj dio općine Vogošća je prepoznat kao jedan od potencijalnih prostora za planinarenje i izletište kojem građani trenutno nemaju adekvatan pristup.

Vijećnica **Curić Samira (u ime Kluba vijećnika SDP)** pokrenula je slijedeću inicijativu:

- 19/5.** Pokrećem inicijativu kojom tražim od nadležne službe hitno postupanje po pitanju kvara na vodovodnoj mreži u ulici Blagovac III, kod broja 102.

Obrazloženje:

Na navedenoj lokaciji već duži vremenski period dolazi do izlivanja vode usljed kvara, što stvara poteškoće za stanovnike ovog područja, uzrokuje nepotrebno rasipanje vode, te može dovesti do dodatnog oštećenja puta i okolne infrastrukture. S obzirom na to da problem traje već duže vrijeme, molim nadležnu službu da u što kraćem roku izvrši uviđaj na terenu i poduzme potrebne mjere kako bi se kvar sanirao i spriječila daljnja šteta.

Vijećnik **Piknjač Admir (Narod i pravda)** pokrenuo je slijedeću inicijativu:

- 19/6.** Pokrećem inicijativu kojom tražim hitnu reakciju nadležnih službi u vezi sanacije klizišta, te stavljanja u funkciju dijela puta u ulici narodnog heroja Muje Šejte, tačnije ispred kuće rahmetli Ismeta Kadrića. Podsjećam, da je na istom lokalitetu 2014. godine došlo do ozbiljnog urušavanja puta, kada su prekinute i instalacije vodovoda i plinovoda. Put je tada privremeno saniran improvizovanim rješenjem – nekoliko drvenih kolaca i drvene konstrukcije postavljeno je kako bi se spriječilo osipanje nasutog materijala za sanaciju puta i omogućio minimalan prolaz stanovništvu. Voda je ponovo priključena, a dio stanovnika je ostao bez plina sve do kraja 2018. godine. Stanje puta na ovom dijelu je ostalo improvizovano i trajalo sve do kraja 2025 godine. Krajem 2025 godine, tačnije nakon obilnijih jesenjih kiša došlo je do ponovnog urušavanja puta, a potok koji je prolazio ispod puta izlio se i bukvalno ga poplavo, odnosno odnio cijeli dio puta, tako da je put postao totalno neprohodan. Vodovod je tada pokidan i intervenisali su iz KJKP „Vodovod i kanalizacija“ d.o.o. Sarajevo i uspjeli privremeno premostiti vodovodne cijevi i tako uspostaviti dotok vode stanovništvu, koje nikako ne može biti trajno rješenje. Instalacije plina su ostale u urušenom dijelu puta. Operateri iz KJKP „Sarajevogas“ su izlazili na lice mjesta i procijenili da je pitanje dana kada će plinska instalacija popustiti i da može doći do još ozbiljnijeg problema. Od 2014. godine do danas stanovnici su se više puta obraćali nadležnoj općinskoj službi i odgovor je uvijek bio isti da se radi projekat za sanaciju puta od 50 m, ali projekat nikada nije realizovan, niti je izvršena bilo kakva radnja kako bi se put rekonstruisao i stavio u funkciju. Stanovnici obližnjih kuća, koji imaju svoja imanja nedaleko od urušenog puta, primorani su obilaziti po nekoliko kilometara okolnim putem, iako bi im funkcionalan put značio prolaz i prilaz od svega nekoliko stotina metara. Naglašavam i da se radi o ulici narodnog heroja Muje Šejte, čija porodica svakodnevno koristi ovaj dio puta do prilaza svojoj porodičnoj kući. Napominjem i da je predmetni put u ratu bio jedina komunikacija ka našoj liniji odbrane i spasio je mnoge živote. Bez obzira na navedene činjenice, put se mora osposobiti za svoju svrhu – sigurnu i funkcionalnu komunikaciju za građane. Ovom inicijativom još jednom tražim od nadležne općinske službe, hitan izlazak stručnih službi na teren radi procjene stanja, izradu i realizaciju projekta sanacije puta i klizišta, uz uvažavanje historijskog značaja i svakodnevne potrebe građana. Molim Općinsko

vijeće da ovu inicijativu prihvati, a da se nadležne službe obavežu da se što hitnije uspostavi komunikacija na ovom dijelu puta. Uz ovu inicijativu prilažem i slike sa lica mjesta koje jasno dokumentuju stanje i potrebu za hitnom intervencijom.

Vijećnica **Džano Emina (u ime Kluba samostalnih vijećnika Bogilović-Džano)** pokrenula je slijedeću inicijativu:

19/7. Na zahtjev mještana naselja Ugorsko pokrećem inicijativu za hitnu sanaciju i rekonstrukciju dijela ulice Mujo Šejto, tačnije dionice između broj 76 i 77.

Obrazloženje:

Mještani ovog naselja već godinama ukazuju na problem koji je, usljed neadekvatne reakcije nadležne službe, danas prerastao u ozbiljnu prijetnju za sigurnost ljudi i njihove imovine. Od 2014. slušaju obećanja o rješavanju ovog problema, dok stvarnost svakim danom postaje sve teža i opasnija. U jesen prošle godine se ponovo pokrenulo klizište, gdje je u početku bila vidljiva samo jedna pukotina koja očigledno nije dovoljno ozbiljno shvaćena što je rezultiralo stanjem koje imamo danas. Donji dio saobraćajnice praktično nije zaštićen. Nekoliko dotrajalih drvenih stubova, postavljenih prije više godina, trenutno ne predstavlja nikakvu ozbiljnu zaštitu. Dodatno zabrinjava činjenica da rupa, koja je iskopana prije više mjeseci i dalje stoji otvorena, bez ikakve zaštite. Da bi problem bio veći, došlo je do pojave još jedne rupe, koja je zarasla rastinjem i time dodatno ugrožava pješake koji tu često moraju prolaziti. Ako uzmemo u obzir činjenicu da su plinske instalacije postavljene sredinom ceste, gore navedene probleme, možemo smatrati manjim problemima. Vi znate da su mještani ovog dijela naselja 4 godine bili uskraćeni za plin, tačnije do 2018. godine i sad ih ponovo dovodimo u situaciju da svakodnevno strahuju da bi daljnje pomjeranje tla moglo dovesti do pucanja cijevi i nesagledivih posljedica. Pitam vas, ko će snositi posljedice ukoliko dode do pucanja tih cijevi. Umjesto konkretnih mjera, pukotine na asfaltu pokrili ste najlonom i smatrate da ste time privremeno riješili problem. Da li je to zaista rješenje koje stručne osobe iz nadležne službe smatraju adekvatnim. Prosto je nemoguće povjerovati da nekoliko komada najlona može predstaviti odgovor na problem koji iz dana u dan postaje sve opasniji za mještane naselja Ugorsko. U ovom dijelu naselja živi, između ostalog, najstariji stanovnik naše općine, podsjetit ću vas da je nedavno nekoliko vas koji danas u ovoj sali sjedite bilo prisutno na proslavi, slikali se i iskazali poštovanje. Danas kad su njemu i njegovim komšijama potrebni konkretni potezi i pomoć nadležnih, reakcija istih tih koji su se slikali sa njim je izostala. I ne samo to, godinama se obećava ljudima, pričaju priče i sve ostaje samo na tim pričama. Vrijeme je da se te priče zaustave i da se počne konkretno djelovati, u suprotnom će biti prisiljeni da organizuju proteste i da svoja prava traže pred nadležnim institucijama. Ovo nije jedan problem, ovdje je niz problema koji se iz dana u dan samo šire, pa tako i kada je riječ o javnoj rasvjeti. Trenutno u tom dijelu postoje dva stuba, od kojih je jedan već vidno iskrivljen i pitanje je vremena kada će popustiti pod pritiskom tla. Rasvjeta na drugom stubu uopće ne radi, potpuno je obraslo rastinjem i pristup joj je skoro pa onemogućen. Kad smo kod onemogućenog pristupa, predstavnik Civilne zaštite je prilikom intervjua za RTV Vogošća izjavio kako postoje 2 alternativna puta, ali nije naveo da tim putem nije moguće nesmetano kretanje teretnih vozila niti prolazak vatrogasnog vozila. To je put između dvije kuće na oštroj krivini širok 2 m. Vidimo kakve su temperature ovih dana, šta ukoliko dođe do požara, ko će u tom slučaju biti odgovoran i ko će snositi posljedice za svoj nerad i nemar. Prema najavama meteorologa od srijede, tačnije od sutra najavljene su obilne padavine što mještanima, ali i komplet naselju Ugorsko, dodatno pojačava strah i osjećaj nesigurnosti. Dovodimo se u situaciju, ko zna koji put, da liječimo posljedice i prebacujemo odgovornost sa jednih na druge — bez adekvatne reakcije. Uvaženi predstavnici Službe, građani ovog dijela naselja ne traže nikakve privilegije. Traže ono osnovno — sigurnost. Traže dostojanstven i siguran pristup svojim kućama. Traže ono što je nadležnima trebao biti prioritet odavno. Da li znate da je nedavno žena dok je vodila dijete do školskog autobusa pala i povrijedila se. Da li znate da je mogla pokrenuti postupak koji bi dodatno koštao našu Općinu. Možda i znate, ali vas očito ne zanima. Nemojte mi, molim vas, ni u kom slučaju u odgovoru navesti kako se nema novca, kako se čeka na projekat i sl., jer ljudski život nema cijenu, nijedan projekat nije vrijedan ukoliko neko nastrada. Dobro znate da ovo nije prvi put da upozoravam na potencijalne izuzetno opasne posljedice, i ne radim to da bi se negdje u zapisniku navelo kako sam ja nešto rekla, nego zato što se zaista suosjećam sa svojim sugrađanima i sugrađankama i ne mogu da budem nijemi posmatrač. Od nadležnih očekujem i zahtjevam hitnu reakciju, jasan plan djelovanja i konkretne rokove za realizaciju.

Vijećnik **Mehić Almedin (u ime Kluba vijećnika SDA)** pokrenuo je slijedeću inicijativu:

- 19/8.** Pokrećem inicijativu prema nadležnima za nabavku sanitetske opreme Planinarskom domu „Motka“.

Obrazloženje:

Planinarski dom „Motka“ posljednjih godina posjećuje veliki broj turista, planinara, a također i naših građana koji izlaze na čist zrak sa svojim porodicama. Naime, prije nekih dvadesetak dana desio se jedan slučaj gdje je čovjeku pozlilo, te mu je pružena prva pomoć neki tip improvizacije i općeg znanja naših planinara. Nismo imali nosila, te smo čekali hitnu da oni sa svojom opremom snesu čovjeka do vozila. Da se ne bi više ponavljala ta praksa, pokrećem inicijativu da se nabave sanitetska nosila i torba hitne pomoći, kako bi osigurali makar toliko da se neko spasi. Nadam se da svi imaju razumjevanja i da će ispoštovati ovu inicijativu.

Vijećnik **Hebib Armin (u ime Kluba vijećnika SDP)** pokrenuo je slijedeće inicijative:

- 19/9.** Pokrećem inicijativu za postavljanje zaštitne ograde na mostiću u ulici između Branilaca Vijenca broj 3., i dječijeg igrališta.

Obrazloženje:

U neposrednoj blizini navedenog mostića nalazi se dječije igralište koje svakodnevno koristi veliki broj djece, posebno djece mlađeg uzrasta, kao i njihovih roditelja i staratelja. Zbog nepostojanja adekvatne zaštitne ograde na mostiću postoji ozbiljan sigurnosni rizik, te je pitanje vremena kada bi moglo doći do neželjenog događaja ili nesreće. Ova inicijativa pokrenuta je na zahtjev i molbu građana, posebno roditelja čija djeca svakodnevno borave na predmetnom igralištu. Postavljanjem zaštitne ograde značajno bi se povećala sigurnost svih korisnika ovog prostora i spriječile potencijalne nezgode. Stoga predlažem da nadležne općinske službe, u skladu sa svojim nadležnostima i mogućnostima, izvrše uviđaj na terenu te poduzmu potrebne aktivnosti u cilju postavljanja zaštitne ograde na navedenom mostiću.

- 19/10.** Pokrećem inicijativu za postavljanje kanti za otpad kod podvožnjaka u ulici Tome Mendeša.

Obrazloženje:

Na lokaciji podvožnjaka u Ulici Tome Mendeša trenutno nisu postavljene kante za odlaganje otpada. Zbog toga nesavjesni pojedinci često odlažu smeće duž podvožnjaka i njegove neposredne okoline, čime se narušava izgled javne površine i stvara nehygieničko okruženje. Na zahtjev i molbu građana koji stanuju u obližnjim zgradama podnosim ovu inicijativu, s ciljem da se postavljanjem kanti za otpad omogući pravilno odlaganje otpada, smanji nepropisno odlaganje smeća te unaprijedi čistoća i urednost ovog dijela naselja. Smatram da je riječ o jednostavnoj i finansijski skromnoj mjeri koja može imati značajan pozitivan efekat na održavanje komunalne higijene i kvalitet života građana.

Vijećnik **Škoro Hamdija (u ime Kluba vijećnika Naprijed BiH)** pokrenuo je slijedeće inicijative:

- 19/11.** Pokrećem inicijativu prema nadležnoj općinskoj službi da se u Vogošći obilježe pješački prelazi, obzirom da je većina istih izbrisana i nije vidljiva. Molim službu da zbog sigurnosti građana i učesnika u saobraćaju što hitnije riješi ovaj problem.

- 19/12.** Pokrećem inicijativu za sanaciju i rekonstrukciju dječijeg igrališta u ulici Spasoja Blagovčanina između brojeva 12. i 14., koje se nalazi u izuzetno lošem stanju. Molim službu da u što kraćem periodu pristupi sanaciji ovog igrališta, umjetne trave, mobilijara, kao i postavljanje dovoljnog broja kanti za smeće koje također nedostaju.

Vijećnik **Pašić Edin (u ime Kluba vijećnika SDA)** pokrenuo je slijedeću inicijativu:

- 19/13.** Na zahtjev mještana kraka uice Branilaca Hotonja (od broja 200 do broja 220) pokrećem inicijativu nadležnoj općinskoj službi kao i Ministarstvu saobraćaja Kantona Sarajevo za postavljanjem saobraćajnog ogledala na raskrsnici ovog kraka, kao i postavljanje nedostajuće table na početku kraka sa kućnim brojevima koji se nalaze u kraku ulice.

Vijećnica **Karović Amra (u ime Kluba vijećnika SDP)** pokrenula je slijedeće inicijative:

- 19/14.** Pokrećem inicijativu da se postave vibracione trake na dionici ulice Blagovac I od broja 33. do broja 51., sa lijeve strane i od broja 14. do ispod 36., sa desne strane.

Obrazloženje:

Stacionarni usprovači brzine nisu atraktivni, međutim zbog nesavjesnih vozača sa neprilagođenom brzinom vožnje kroz naseljeno područje opravdava njihovo postavljanje. Vibro trake proizvode jače vibracije i time upozoravaju vozače da smanje brzinu, što u konačnici i jeste cilj. Molim nadležne službe da u što kraćem roku realiziraju i ocjene ovu inicijativu opravdanom. Fotografije u prilogu.

- 19/15.** Pokrećem inicijativu da se sanira stepenište u ulici Skendera Kulenovića između brojeva 22. i 18.

Obrazloženje:

Stepenište koje se nalazi između dvije zgrade u pomenutoj ulici je oštećeno i polomljeno što može dovesti do padova i povređivanja osoba koje koriste i svakodnevno silaze stepeništem. Stepence vode do autobuskog stajališta na glavnu dionicu Vogošća-Sarajevo, što znači da ih svakodnevno koriste učenici koji se voze gradskim prijevozom. Molim nadležne službe za izađu na teren i u što kraćem roku poprave i uredi stepenište. Fotografije u prilogu.

Vijećnik **Handić Jasmin (u ime Kluba vijećnika SDA)** pokrenuo je slijedeće inicijative:

- 19/16.** Pokrećem inicijativu prema JP Ceste Federacije za hitnu sanaciju i ugradnju zaštitne ograde uz magistralni put Sarajevo – Tuzla, na dijelu pješačke staze od restorana Cigo prema ulici Nova željeznička stanica.

Obrazloženje:

Zaštitna ograda, koja odvaja pješačku stazu od željezničke pruge, oštećena je u dvije saobraćajne nezgode, nakon čega je uklonjena i do danas nije vraćena. Time je ozbiljno ugrožena sigurnost pješaka i biciklista koji svakodnevno koriste ovu stazu, a nemaju drugu sigurnu alternativu do Nove željezničke stanice. Zbog navedenog, potrebno je hitno izvršiti sanaciju i ugradnju nedostajućih dijelova zaštitne ograde kako bi se osigurala sigurnost svih korisnika.

- 19/17.** Pokrećem inicijativu prema JU Domovi zdravlja Kantona Sarajevo i Ministarstvu zdravstva Kantona Sarajevo sa ciljem uspostavljanja dežurne pedijatrijske ambulante nedjeljom na području općine Vogošća.

Obrazloženje:

Na području općine Vogošća živi veliki broj djece predškolskog i školskog uzrasta, zbog čega postoji opravdana potreba za dostupnom pedijatrijskom zdravstvenom zaštitom i tokom vikenda. Trenutno su roditelji nedjeljom primorani odlaziti u zdravstvene ustanove u drugim općinama Kantona Sarajevo, što predstavlja dodatno opterećenje i produžava vrijeme potrebno za pružanje zdravstvene pomoći. Realizacijom ove inicijative omogućila bi se dostupnija i kvalitetnija zdravstvena zaštita djece, olakšao pristup zdravstvenim uslugama roditeljima te doprinijelo rasterećenju dežurnih pedijatrijskih ambulanti u drugim općinama.

Vijećnik **Omerović Denis (u ime Kluba vijećnika SDP)** pokrenuo je slijedeće inicijative:

- 19/18.** Pokrećem inicijativu da nadležna općinska služba izvrši ocrtavanje parking mjesta u ulici Braće Kršo.

Obrazloženje:

Nepropisno i neorganizovano parkiranje na ovoj lokaciji često otežava saobraćaj i smanjuje broj raspoloživih parking mjesta, zbog čega je potrebno što prije pristupiti obilježavanju i uređenju postojećeg parking prostora, s ciljem boljeg organizovanja saobraćaja, efikasnijeg korištenja raspoloživog parking prostora i povećanja sigurnosti svih učesnika u saobraćaju. Predlažem da nadležna služba izvrši procjenu stanja na terenu i, u skladu s mogućnostima, pristupi realizaciji ove inicijative u što kraćem roku.

- 19/19.** Pokrećem inicijativu za dodatno osvijetljavanje i adekvatno obilježavanje pješačkog prelaza na magistralnom putu Vogošća – Semizovac, kod skretanja za naselje Poturovići.

Obrazloženje:

S obzirom da je odgovor izostao na moju ranije upućenu inicijativu, a iskreno vjerujem da je od velikog značaja i da će doprinjeti sigurnosti u saobraćaju, istu upućujem ponovo. Predlažem se da se prelaz označi i osvijetli kroz horizontalno svjetlosno označavanje kolovoza te postavljanje vertikalne svjetlosne signalizacije (svjetleći saobraćajni znak), po uzoru na pješački prelaz na regionalnom putu Semizovac – Donja Vogošća, a isti se nalazi nedaleko od skretanja prema Donjoj Vogošći iz pravca Semizovca, a kao primjer može

poslužiti i pješački prelaz u Vogošći kod BBI banke. S obzirom da je na navedenoj dionici ograničenje brzine 60 km/h, da vozači često ne prilagođavaju brzinu uslovima na putu te da je riječ o dionici sklonoj saobraćajnim nezgodama, dodatno svjetlosno označavanje značajno bi doprinijelo sigurnosti pješaka i skrenulo pažnju vozačima na obaveznu smanjenja brzine. Molim nadležnu instituciju da razmotri ovu inicijativu i poduzme potrebne mjere u cilju unapređenja sigurnosti saobraćaja.

Vijećnik Turković Faruk (u ime Kluba vijećnika SDA) pokrenuo je slijedeću inicijativu:

19/20. Pokrećem inicijativu prema Službi za komunalne poslove Općine Vogošća, sa zahtjevom da se ista, zajedno sa pratećom dokumentacijom, proslijedi Ministarstvu saobraćaja Kantona Sarajevo radi poduzimanja aktivnosti iz njihove nadležnosti. Predmet inicijative je uvođenje novih minibuskih linija Vogošća - Ugorsko (do Mujkića brda) i Vogošća – Kremeš. Predlažem da Služba za komunalne poslove Općine Vogošća izvrši reviziju te utvrdi optimalne trase za nove minibuske linije: Vogošća - Ugorsko (do Mujkića brda) i Vogošća – Kremeš. Nakon izvršene revizije, potrebno je da Služba sačini prijedlog trasa sa svim neophodnim tehničkim elementima i isti dostavi u prilogu ove inicijative Ministarstvu saobraćaja Kantona Sarajevo, uz zahtjev za izdavanje potrebne saglasnosti i pokretanje postupka za uspostavljanje navedenih minibuskih linija.

Obrazloženje:

Stanovnici naselja Ugorsko, posebno gornjeg dijela naselja do Mujkića brda, kao i naselja Kremeš, godinama se suočavaju s nedovoljnom povezanošću javnim prijevozom. Značajan broj građana, među kojima su učenici, studenti, radnici, penzioneri i druge kategorije stanovništva, svakodnevno ima poteškoće u dolasku do centra Vogošće i daljnjem povezivanju s ostatkom Kantona Sarajevo. Uvođenjem navedenih minibuskih linija unaprijedila bi se dostupnost javnog prijevoza, povećala mobilnost stanovništva, te značajno poboljšao kvalitet života građana ovih naselja. Smatram da postoji opravdan javni interes za realizaciju ove inicijative te očekujem da nadležne institucije, svaka u okviru svojih nadležnosti, poduzmu potrebne aktivnosti kako bi se građanima omogućio kvalitetniji i dostupniji javni prijevoz.

Vijećnik Pašagić Almir (u ime Kluba vijećnika SDP) pokrenuo je slijedeće inicijative:

19/21. Pokrećem inicijativu da Općina Vogošća pokrene proceduru osnivanja i implementacije lokalne razvojne agencije pod nazivom Vogošćanska agencija za razvoj (VAR).

Obrazloženje i ciljevi:

Općina Vogošća ima snažan industrijski, privredni i ljudski potencijal. Za maksimalno iskorištavanje ovih resursa potreban je specijalizovan i operativan organ. Agencija VAR bi djelovala kao ključni pokretač lokalnog ekonomskog razvoja. Glavni ciljevi i zadaci agencije VAR:

- Privlačenje investicija: Aktivna promocija Vogošće kao atraktivne zone za domaće i strane investitore.
- EU fondovi: Priprema, prijava i upravljanje projektima finansiranim iz fondova Evropske unije i drugih međunarodnih donatora.
- Podrška poduzetništvu: Pružanje tehničke i savjetodavne pomoći lokalnim malim i srednjim preduzećima (MSP) te startupima.
- Zapošljavanje: Kreiranje programa dokvalifikacije i prekvalifikacije radne snage u saradnji sa privredom.
- Infrastruktura: Razvoj i upravljanje poslovnim i industrijskim zonama na području općine.
- Javno-privatno partnerstvo: Povezivanje javnog sektora s privatnim preduzećima radi realizacije kapitalnih projekata.

Predloženi koraci realizacije

1. Izrada studije opravdanosti: Služba za privredu i lokalni ekonomski razvoj kreira analizu ekonomske opravdanosti osnivanja VAR-a.
2. Pravni okvir: Izrada nacrtu Odluke o osnivanju agencije i definisanje njene pravne forme (npr. javno preduzeće, društvo sa ograničenom odgovornošću ili javna ustanova).
3. Finansijski plan: Planiranje inicijalnih sredstava u Budžetu Općine Vogošća za osnivanje i prvu godinu rada agencije.
4. Usvajanje na Vijeću: Upućivanje Odluke o osnivanju na glasanje Općinskom vijeću.

Osnivanjem Vogošćanske agencije za razvoj (VAR), Općina Vogošća bi dobila moderan alat za ubrzan ekonomski razvoj, otvaranje novih radnih mjesta i efikasnije povlačenje bespovratnih vanjskih sredstava.

19/22. Pokrećem inicijativu da za realizaciju projekta izgradnje tri javne česme na platou ispred zgrade Općine Vogošća. Pokrećem inicijativu da Općina Vogošća u Budžetu osigura sredstva za projektovanje i izgradnju tri moderne javne česme. Projekat nosi simbolični naziv „VOG“, gdje svako slovo predstavlja jedan stub funkcionalnosti i održivosti:

- V – Voda: Simbol života, osnovnog ljudskog prava i javnog dobra dostupnog svima.
- O – Oxigen (Kiseonik): Simbol čiste prirode, ekološke svijesti i zdravog okruženja.
- G – Građanin: Simbol lokalne zajednice kojoj su ove česme primarno namijenjene.

Obrazloženje:

Plato ispred zgrade Općine Vogošća predstavlja centralno mjesto okupljanja, pješačku zonu i lokaciju sa velikom frekvencijom građana svih uzrasta. Izgradnjom ovih česmi ostvaruju se sljedeći ciljevi:

- Javno zdravlje: Omogućava se besplatan pristup pitkoj vodi tokom vrelih ljetnih mjeseci.
- Ekologija: Smanjuje se upotreba plastičnih flašica i promoviše očuvanje okoliša.
- Estetika: Vogošća dobija prepoznatljiv, moderan i funkcionalan urbanistički detalj.

Molim nadležnu službu da pristupi izradi idejnog rješenja, provjeri tehničke mogućnosti na terenu te dostavi procjenu potrebnih finansijskih sredstava. Pored ove javne česme predlažem da se sa obije stane stavo po jedna klupa, kako bi ljudi mogli da se odmore i konzumiraju vodu za osvježenje.

Vijećnik **Bogilović Enis** (u ime Kluba samostalnih vijećnika **Bogilović-Džano**) pokrenuo je slijedeću inicijativu:

19/23. Pokrećem inicijativu prema Cestama Federacije BiH da se na Magistralnom putu M17 preko puta restorana Čardak sanira kolovoz koji se nalazi u blizini autobusnog stajališta.

Vijećnik **Glija Bego** (u ime Kluba vijećnika **S BiH**) pokrenuo je slijedeću inicijativu:

19/24. Pokrećem inicijativu za pokretanje programa finansiranja i sufinansiranja ugradnje sistema za hlađenje u javnim ustanovama na području općine Vogošća. Predlažem da Vlada Kantona Sarajevo, putem nadležnih ministarstava, pokrene program finansiranja i sufinansiranja nabavke i ugradnje klima-uređaja i drugih energetski efikasnih sistema za hlađenje u javnim ustanovama, uz prethodnu izradu sveobuhvatne analize trenutnog stanja i potreba svih javnih ustanova na području općine Vogošća.

Obrazloženje:

Klimatske promjene i sve učestaliji toplotni valovi dovode do ekstremno visokih temperatura koje značajno utiču na uslove boravka i rada u javnim ustanovama. Posebno su ugroženi korisnici i zaposlenici u predškolskim ustanovama, osnovnim i srednjim školama, domovima zdravlja, ustanovama socijalne zaštite i domovima za starije osobe. Radi planskog i ravnomjernog ulaganja, potrebno je najprije izvršiti analizu postojećeg stanja, utvrditi koje ustanove nemaju adekvatne sisteme za hlađenje ili raspolažu zastarjelom opremom, te na osnovu utvrđenih potreba izraditi prioritete i plan realizacije. Ulaganjem u moderne i energetski efikasne sisteme za hlađenje unaprijedio bi se kvalitet usluga, zaštitilo zdravlje korisnika i zaposlenika te stvorili sigurniji i humaniji uslovi za boravak i rad. Zbog navedenog, predlažem da Vlada Kantona Sarajevo razmotri ovu inicijativu, provede analizu trenutnog stanja, obezbijedi potrebna budžetska sredstva i izradi program koji će omogućiti postepenu realizaciju ovog projekta u svim javnim ustanovama kojima je to potrebno ne samo na području općine Vogošća, nego i na cijelom području Kantona Sarajevo.

UKOVODILAC
STRUČNE SLUŽBE ZA POSLOVE
OPĆINSKOG VIJEĆA

Crvenjak Elvir